



SCUMOND DA PUBLICAZIUN fin ils 28 d'avust 2008, 10.00 h

La furmaziun en il sector da la sanadad ed ils fatgs socials è fitg dumandad

Per l'emprima giada ha cumenzà en avust 2008 in onn da scola da nossa instituziun da furmaziun sut in unic tetg: en il nov edificium-CFSS a la staziun da Cuir. Cun quest pass impurtant daventa l'access a las professiuns en ils secturs da la sanadad ed ils fatgs socials pli attractiv e la furmaziun ha ina meglra qualitat en il chantun Grischun.

Il Cusseglie guvernativ Claudio Lardi, schef dal Departament d'educaziun, cultura e protecziun da l'ambient e president dal cussegl da scola, e Veronika Niederhauser, directura dal CFSS, infurmeschan las medias davart ils ultims svilups e las perspectivas dal Center da furmaziun per la sanadad ed ils fatgs socials (CFSS) dal chantun Grischun.

Umans interessads en il center

En il center da noss engaschament stattan umans che han plaschair d'emprender e vulan prestar insatge. Els èn pronts da surpigiar la responsabladad en il mund fascinanz da la sanadad ed ils fatgs socials; ultra da quai èn els motivads d'emprender ina professiun pretensiusa. Il CFSS porscha ad els l'experiencescha da blers onns sco center da cumpetenzas en il sector da furmaziun per la sanadad ed ils fatgs socials sco era ina furmaziun solida ed orientada vers l'avegnir. Questa promova las cumpetenzas professiunalas, umanas e socialas da las circa 500 personas ch'emprendan e studegian sco era da radund 300 absolventas ed absolvents da perfecziunaments.

Las furmas modernas d'emprender, il clima stimulant d'emprender, ina didactica innovativa e la maschaida constanta da teoria actuala e pratica procuran per premissas optimalas per l'entschatta professiunala ed uschia per accumplir ina incumbensa pli e pli impurtanta da nossa societad. L'instrucziun en il CFSS maina las personas ch'emprendan e studegian ad in giuditgar ed in agir independent en l'ambient dals fatgs socials e da la sanadad.

Sco center da cumpetenzza porscha il CFSS Grischun in team da docents bain qualifitgads, metodas modernas d'instrucziun che sa drizzan tenor las ultimas enconuschientschas dal transfer da savida, in equipament fitg efficazi sco era in'administraziun da scola effizienta ed orientada al servetsch. Nossa purschida correspunda entir ed entratg a las pretaisas dal standard da furmaziun naziunal ed internaziunal e dal martgà da lavur.

Vasta purschida da furmaziun

L'instrucziun en il CFSS intermediéscha a la nova generaziun per la tgira e l'assistenza en ospitals, chasas e servetschs ambulants betg mo qualificaziuns solidas e vastas enconuschientschas, mabain era connexs interdisciplinars. Il CFSS porscha dapli ch'ina dunsaina da scolaziuns e perfecziunaments (www.bgs-chur.ch). Il spectrum cumpiglia furmaziuns da basa professiunalas sin il stgalim secundar II, scolaziuns e perfecziunaments sco era studis da diplom supplementar sin il stgalim terziar. En il program sa chattan era curs specifics, lavuratoris e seminaris.

Per umans giuvens spezialmain diligents po la via al success professiunal manar sur la maturitad professiunala cun direcziun sanadad e fatgs socials. Per creschids senza diplom da tgira existan pussaivladads interessantas per cuntanscher qualificaziuns complementaras a la professiun, per exempel l'attest da qualificaziun sco emploià(-ada) spezialisà(-ada) da sanadad u il certificat en gerontologia.

Grazia a questa purschida vasta e differenziada da scolaziun e da perfecziunament èn nossas personas ch'emprendan e noss students abels da sviluppar ina buna autocumpetenzza e cumpetenzza sociala. Durant la scolaziun orientada a la pratica ed a la cumpetenzza na s'occupan els betg mo da las enconuschientschas professiunalas teoreticas, mabain era da dumondas realas da nossa societad. Noss curs èn perquai ina fitg buna investiziun per la vita ed ina preparaziun eccellente per il mund da lavur.

Mentalitad innovativa

La structura dal CFSS, ina instituziun independenta da dretg public dal chantun Grischun, è anc adina en ina fasa da transiziun e da svilup, perquai che la gronda refurma naziunala da la furmaziun en il sector da la sanadad ed ils fatgs socials vegn a cuntinuar fin suenter l'onn 2011. Quai signifitga che era il CFSS vegn ad adattar cuntinuadamain ses novs programs da furmaziun. Ultra da quai è planisà da stgaffir in post da perscrutaziun per il sector da tgira e d'assistenza en il proxim temp.

Tuttina ha il CFSS pudì sa consolidar en tuts grads ed introducir las pli novas metodos d'emprender sco e-learning, skills-training, problem-based-learning ed era blended-learning.

En il sector da la furmaziun vegn introducì e-learning en bleras variantas. Las plattafurmas Moodle ed Olat implementadas al CFSS vegnan applitgadas sco software da la tecnica d'infurmaziun e comunicaziun. Ellas sustegnan process d'instruir e d'emprender e gidan ad administrar materialias d'emprender e datas d'utilisader. Sin las plattafurmas d'emprender na vegn betg mo coordinà l'andament d'in process d'emprender cooperativ che sa basa sin il web. I vegnan era elavurads cuntegns en furma electronica che pon vegnir svilup pads ed utilisads vinavant.

Per la scolaziun ed il perfecziunament professiunal vegn favurizada la metoda da blended-learning. I vegnan damai cumbinads ils elements da preschientscha sco lavuratoris, seminaris, prelecziuns cun elements sustegnids da computers sco forums da discussiun, chat, Wikipedia etc.

Skillslab è ina da las pli impurtantas unitads d'emprender da la furma d'emprender PBL (problem-based-learning) ch'è vegnida implementada surtut en la scola speziala superiura per la tgira en il CFSS. Cun ils exercizis pratics vegnan trenadas qualificaziuns ed abilitads. L'exercitar predominescha ed ins emprenda in da l'auter, dad expertas ed experts e cun films da trenament. L'exercizi cun pazientas e pazients da simulaziun s'ha demussà sco spezialmain instructiv. Acturas ed acturs laics surpiglian la rolla da l'uman/dals umans da tgirar cun agid dad in'instrucziun determinada da las rollas. Questas sequenzas da trenament han lieu mintga tschintg emnas en ils curs da bloc. La professiunalitad da questas unitads d'emprender vegn garantida dal CFSS tras ina stretga collavuraziun cun in reschissur versà ed in gruppa d'acturas ed acturs laics dal Grischun. Tant studentas e students sco acturas ed acturs laics stiman questa purschida efectiva d'emprender e s'engaschan en moda entusiasmada.

Biblioteca publica spezializada

Il CFSS vul esser in'instituziun averta. El na cumprova quai betg mo cun sia buna e viva collavuraziun cun instituziuns partenarias entaifer ed ordaifer il chantun, mabain era cun stgaffir ina biblioteca publica spezializada per il champ social e da la sanadad. I na sa tracta betg mo d'ina biblioteca da scola, mabain d'ina biblioteca spezializada che pussibilitescha a studentas e students ed a la publicitad l'access sistematic ad infurmaziuns scientificas ed a savida archivada. La biblioteca promova la lectura al monitor gist uschia sco la lectura d'in cudesch.



Ils accents principals da la nova biblioteca furman tant las medias tradiziunalas sco cudeschs, revistas en furma stampada e videos, sco era las medias novas sco revistas electronicas ed e-books or dals champs da la tgira ed assistenza, medischna, sociologia, psicologia, ciencias socialas, communicaziun, manaschament.

Di da las portas avertas

Per nus èsi impurtant che la publicitad emprendia ad enconuscher il CFSS sco center da furmaziun e cumpetenzza ed al possa visitar. Per quest motiv vegn il CFSS ad organisar ils 25 october 2008 in di da las portas avertas. La populaziun vegn pia a pudair visitar il pli grond edificiu da minergia dal chantun Grischun sper il „binari D“ a la staziun da Cuira. Ella vegn era a pudair constatar ch'il chantun Grischun è al puls dal temp en il champ da la sanadad e dals fatgs socials. Numerusas attracziuns spetgan las visitadras ed ils visitaders da mintga gruppa da vegliadetgna. Las visitadras ed ils visitaders vegnan a vesair, co ch'il CFSS s'engascha per ina qualitat maximala en la scolaziun ed il perfecziunament e per ina colliaziun directa cun il mund da professiun.

Infurmaziun: Veronika Niederhauser, directura CFSS; tel. 081 286 85 00

Internet: www.bgs-chur.ch

Cuira, ils 28 d'avust 2008